

Bil. 26

Rabu

3 Ogos 2022



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KELIMA
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Unit Transformasi Masyarakat India Malaysia (MITRA), Kementerian Perpaduan Negara**
- *YB. Tuan M. Kulasegaran (Ipoh Barat)* (Halaman 1)
- **Masalah Banjir Kilat di Kawasan Kulai**
- *YB. Puan Teo Nie Ching (Kulai)* (Halaman 7)

**MALAYSIA
KAMAR KHAS
PARLIMEN KEEMPAT BELAS
PENGKAL KELIMA
MESYUARAT KEDUA
Rabu, 3 Ogos 2022**

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Rangkaian Stesen Pengecas Kenderaan Elektrik (EV) di Malaysia

2.34 ptg.

Tuan M. Kulasegaran [Ipoh Barat]: Terima kasih Tuan Yang di-Pertua. Loceng banyak lamalah. Kurangkan masa dia dari dua minit ke setengah minit, cukup.

Timbalan Yang di-Pertua [Dato' Mohd Rashid Hasnon]: Kena Usul.

Tuan M. Kulasegaran [Ipoh Barat]: Usul ya? Okey saya Usul sekaranglah.

Timbalan Yang di-Pertua [Dato' Mohd Rashid Hasnon]: *[Ketawa]* Silakan.

Tuan M. Kulasegaran [Ipoh Barat]: Matlamat utama MITRA ditubuhkan adalah untuk memperkasa status sosioekonomi masyarakat India. Nampaknya, MITRA tidak dapat mengubah nasib masyarakat India dalam hal ekonomi mereka. Pertemuan dengan wakil persatuan NGO kaum India didapati bahawa pelbagai dimensi pemerikasaan sosial masyarakat India masih belum dapat direalisasikan.

Ramai masih berada di bawah garis kemiskinan di mana mereka tidak mampu untuk memiliki rumah sendiri. Wanita komuniti B40 berazam untuk terlibat dalam perniagaan dan apa jenis bantuan MITRA dapat dihulurkan kepada mereka?

Kebanyakan golongan miskin kaum India menghadapi cabaran kompleks yang memerlukan pendekatan yang lebih bersepadu dengan berdasarkan kepada situasi tempatan.

Dana MITRA yang sepatutnya disalurkan kepada golongan miskin kaum India telah disalahgunakan dan diselewengkan oleh ahli politik. Ia sama dengan skandal *telecom share* kewangan Maika Holdings Berhad dan Skim Menanam Cili (NAAM).

MITRA gagal mencapai dan memenuhi sasaran kerajaan iaitu ekuti tiga peratus untuk masyarakat India. Namun, penyertaan sekarang hanya kira-kira 1.1 peratus sahaja.

Mengapakah kaum India mempunyai peratusan yang lebih tinggi dalam masalah keciciran sekolah, pengangguran, ketagihan alkohol, aktiviti jenayah dan masalah sebagainya? MITRA sepatutnya menumpu tumpuan utama dalam 38 buah daerah di Malaysia dengan projek yang dapat memanfaatkan etnik India.

Peruntukan sebanyak RM 250 juta terpaksa dikembalikan kepada Kementerian Kewangan oleh sebab ia tidak diguna pakai oleh Kementerian. Kenapa hal demikian terjadi? MITRA perlu memohon balik RM250 juta tersebut.

MITRA seharusnya mendedahkan peratusan kaum India yang telah mendapat manfaat *short-term* dan *long-term* daripada program MITRA dan menjelaskan inisiatif khususnya yang telah membawa hasil.

Selain itu, MITRA juga seharusnya menyenaraikan nama syarikat atau individu yang telah diperuntukkan dana. Fakta harus dipaparkan di laman web seperti yang dibuat oleh Kerajaan Pakatan Harapan. Nampaknya, banyak program yang diluluskan masih belum selesai dan ia harus disahkan melalui petunjuk prestasi utama. Jika terdapat percanggahan, adakah tindakan untuk membawa pihak yang terlibat ke muka pengadilan?

MITRA seharusnya menilai semula modus operandinya. Setiap negeri harus menubuhkan cawangan pejabat yang akan memberi tumpuan kepada pembangunan holistik masyarakat.

Kesimpulannya, MITRA harus mengubah modus operandinya serta bersikap telus dalam mengendalikan masalah agar membawa perubahan ketara kepada landskap sosioekonomi masyarakat India. Bolehkah ini terjadi? Terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Ipoh Barat. Sebelum saya menjemput Yang Berhormat Menteri, saya cuma mahu menegur Peraturan Mesyuarat 17(2), Peraturan Mesyuarat (1) dan (2). Yang P.M. 17(2) itu Yang Berhormat boleh meng-*edit* isi ucapan itu dan Ahli itu hendaklah membaca teks yang diluluskan itu sahaja.

Saya perasan ada dua teks yang ditambah. Jadi, saya harap – sebab nanti rekod yang diucapkan mesti sama dengan teks yang telah di-*edit*. Dengan itu saya ingin menjemput Yang Berhormat Menteri Perpaduan Negara untuk menjawab. Silakan, Yang Berhormat Menteri.

2.38 ptg.

Menteri Perpaduan Negara [Datuk Halimah binti Mohamed Sadique]: Terima kasih Tuan Yang di-Pertua. *Assalamualaikum warahmatullahi wabarakatuh*. Salam perpaduan kepada Yang Berhormat Ipoh Barat dan juga Yang Berhormat Kulai.

Tuan Yang di-Pertua, saya ingin menjawab kepada beberapa persoalan yang telah pun dibangkitkan oleh Yang Berhormat Ipoh Barat. Okey, okey – Saya ingat dia hendak bangun bertanya, rupanya hendak tengok muka saya dengan lebih jelas.

Pertama Yang Berhormat, MITRA diwujudkan untuk membantu masyarakat India B40. Itu yang paling utama. MITRA melaksanakan pelbagai program pembangunan, sosioekonomi melalui tiga kluster:

- (i) Modal Insan;
- (ii) Keusahawanan dan Kerjaya; dan
- (iii) Kesejahteraan Sosial.

Di bawah program-program ini, di bawah kluster modal insan, keusahawanan dan kerjaya serta kesejahteraan sosial ia mencakupi pelbagai masyarakat India B40. Bukan sahaja kanak-kanak, pelajar sekolah, orang-orang yang perlukan bantuan daripada MITRA, termasuklah wanita.

Saya ingin menyebutkan kepada Yang Berhormat, Program Pemerkasaan Wanita India B40 ini sentiasa diberikan penekanan. Bukan kerana saya seorang wanita, tetapi memang ia menjadi agenda utama kepada MITRA untuk merubah kehidupan dalam sesebuah keluarga yang ada, kita kena memperkasakan wanita dengan memberikan kemahiran dan sebagainya. Itu yang telah diletakkan dalam garis panduan dalam program yang ada di tiga kluster yang saya sebutkan tadi.

Jadi, maka kerana itu, wanita sentiasa – untuk menentukan supaya Program Pemerkasaan Wanita India ini akan meletakkan wanita sentiasa berada di dalam arus pembangunan negara. Antara program-program yang kita telah laksanakan – dan ada pelbagai lagi program yang sedang kita laksanakan antaranya Program Bantuan Peralatan Peniaga kepada 1,000 orang usahawan kecil wanita.

Kita berikan peralatan kelengkapan untuk mereka memulakan perniagaan kecil, Yang Berhormat. Kita adakan kerjasama dengan Kementerian Pendidikan Malaysia, Kementerian Pengajian Tinggi Malaysia, mengadakan kerjasama dengan pihak kolej komuniti yang ada dalam kawasan Parlimen. Kita bukan sahaja memberikan tumpuan kepada 38 buah daerah yang telah pun dibangkitkan oleh Yang Berhormat yang mempunyai bilangan kependudukan masyarakat India paling ramai, tetapi juga memberikan peluang kepada wanita-wanita India kita yang berada mungkin di taman, di ladang dan sebagainya, bukan termasuk di dalam 38 buah daerah yang disebutkan.

Latihan kemahiran, kita adakan dari semasa ke semasa. Kita buat kerjasama dengan kolej-kolej komuniti, kita buat kerjasama dengan LPPKN, daripada segi promosi kesihatan wanita masyarakat India, selain daripada meningkatkan kapasiti penguasaan wanita dalam mereka memperkembangkan lagi potensi yang ada dalam diri mereka.

Selain daripada itu, Yang Berhormat, program-program MITRA di bawah tiga kluster yang saya sebutkan tadi, dilaksanakan di sembilan buah negeri. Di sembilan buah negeri ini, saya ada senarainya dan sudah tentu Yang Berhormat pun ada senarai sembilan buah negeri yang melibatkan tumpuan program di 38 buah daerah.

Kalau kita lihat Yang Berhormat, daripada pecahan jumlah yang saya sebutkan ini, terdapat pecahan-pecahan di peringkat daerah-daerah, 38 buah daerah yang disebutkan oleh Yang Berhormat dalam usul Yang Berhormat. Program MITRA ini ia melibatkan sembilan buah negeri yang ada kaitan dengan 38 buah daerah iaitu:

- (i) Kedah;

- (ii) Pulau Pinang;
- (iii) Perak;
- (iv) Pahang;
- (v) Selangor;
- (vi) Negeri Sembilan;
- (vii) Melaka;
- (viii) Johor; dan
- (ix) Wilayah Persekutuan Kuala Lumpur.

Pelaksanaan program ini, Tuan Yang di-Pertua, melibatkan peserta sebahagian besar dari 38 buah daerah yang mempunyai kepadatan tinggi masyarakat India yang saya sebutkan sembilan buah negeri tadi. Bermula pada bulan April 2022, penerima-penerima geran kewangan – Yang Berhormat bertanya adakah akan dipaparkan bagi mereka yang menerima yang mendapat kelulusan terhadap mana-mana permohonan yang dibuat oleh mereka secara *online*.

Bermula pada bulan April 2022, penerima-penerima geran kewangan dipaparkan Yang Berhormat dalam portal rasmi MITRA setelah penyaluran geran kewangan itu dilaksanakan. Yang Berhormat juga ada sebut, dalam usaha untuk kita terus memperkukuhkan pengurusan geran kewangan MITRA di peringkat negeri-negeri yang ada, terutama kepada 38 buah daerah dan sembilan negeri.

Saya ingin memaklumkan kepada Yang Berhormat, bahawa pihak MITRA telah pun melantik pegawai-pegawai penyelarasan di enam buah kementerian seperti:

- (i) Pulau Pinang;
- (ii) Perak;
- (iii) Selangor;
- (iv) Negeri Sembilan;
- (v) Johor; dan juga
- (vi) Wilayah Persekutuan.

Insya-Allah, kita akan teruskan kepada negeri-negeri yang lain.

Selain daripada itu, Tuan Yang di-Pertua, soalan yang dibangkitkan oleh Yang Berhormat iaitu peruntukan geran sebanyak RM100 juta yang kita terima, RM250 juta yang telah pun diambil balik. Tidak ada usahakan yang dilaksanakan oleh pihak MITRA oleh pihak kementerian untuk mendapatkan kembali peruntukan kewangan itu.

Saya ingin memaklumkan kepada Yang Berhormat, peruntukan geran MITRA sebanyak RM100 juta setahun ini, ia adalah di bawah Peruntukan Pembangunan (DE), di bawah Unit Perancang Ekonomi.

Sebagaimana peruntukan DE ini, bagi semua kementerian, bukan sahaja Kementerian Perpaduan Negara, ia ada kaitan dengan MITRA, tetapi bagi semua kementerian. Apabila peruntukan tahun semasa itu tidak dapat dihabiskan untuk dibelanjakan, maka ia tidak boleh dibawa ke tahun hadapan. Ini adalah

pemantauan kewangan yang berkuat kuasa di bawah Kementerian Kewangan. Sudah tentulah ia di luar bidang kuasa Kementerian Perpaduan Negara.

Maknanya, kalau peruntukan diberikan – kalau tidak habis belanja, *MOF will take it back*. Oleh sebab itu, apabila Kementerian Perpaduan Negara di wujudkan, Tuan Yang di-Pertua pada tahun 2020 – saya sebut, Yang Berhormat *was not happy at that time*-lah apabila saya sebut program-program yang telah dilaksanakan bagi tahun 2019, pada waktu dahulu. Apabila peruntukan kita terima sebanyak RM100 juta, sebahagian daripadanya – pada tahun 2018 hingga tahun 2019, *transitions of MITRA*. Daripada SEDIC kepada MITRA, MITRA di bawah JPM dan tahun 2020, baru MITRA masuk di bawah Kementerian Perpaduan Negara.

Akan tetapi, di dalam *transitions MITRA*, pada tahun 2018 hingga tahun 2019, tidak dapat dibelanjakan peruntukan itu. Maka, kerana itu Kementerian Kewangan *took back the money*. Akan tetapi, apabila tahun 2020, MITRA diletakkan di bawah Kementerian Perpaduan Negara, *we were given the RM100 million*. Akan tetapi, oleh sebab ada program yang sebelum ini, Tuan Yang di-Pertua, pada tahun 2019 dan sebagainya, masuk sebelum kerajaan baharu yang mana saya berada ini, kita gunakan peruntukan itu untuk kita biayai dan bayar kepada program-program yang telah pun dilaksanakan sebelum itu yang kadang mengambil masa 12 bulan, 24 bulan, 36 bulan.

Jadi, sebahagian daripada peruntukan MITRA tahun 2020, dibayar dan digunakan untuk kita uruskan pembayaran program sebelum MITRA diletakkan di bawah KPN iaitu pada waktu MITRA berada di bawah JPN.

Kemudian, apabila tahun 2021 pun begitu juga. Ada program yang saya sebutkan waktu MITRA berada di bawah JPN dulu, ada program yang 12 bulan, 24 bulan, 36 bulan, kita teruskan pembiayaan bayarannya. Pada tahun ini, MITRA akan menerima RM100 juta, pukal. Penuh kepada MITRA. *Before this*, kita kena selesaikan pembayaran bagi program yang telahpun diadakan dulu iaitu yang melibatkan pembayaran-pembayaran ke atas program yang mengambil masa yang panjang.

Maka, kerana itu Yang Berhormat, RM250 juta itu memang tidak dapat balikkah. *It was before MITRA, it was at SEDIC's time, then after that, after SEDIC it was MITRA*. Apabila Kementerian Perpaduan Negara Tuan Yang di-Pertua, diwujudkan, MITRA diletakkan di bawah kementerian saya, kita dapat pukal RM100 juta itu. Akan tetapi, RM100 juta tidak dapat dibelanjakan penuh kerana kita terpaksa uruskan pembayaran yang saya sebutkan tadi bagi tahun 2020, tahun 2021 dan tahun 2022 kita dapat pukal RM100 juta untuk kita belanjakan.

Seterusnya, Tuan Yang di-Pertua...

Tuan M. Kulasegaran [Ipoh Barat]: *Can do a paper to get back the money, there is a way out*. Ada.

Datuk Halimah binti Mohamed Sadique: *Ya, there is a way out* tetapi sekarang ini kita sudah bincang dengan pihak Kementerian Kewangan. *Now is not the time yet*-lah, sebab banyak perkara yang perlu diuruskan. Saya ingat Yang Berhormat lebih maklum. Soal yang lain nanti kita 'pm tepi'. Yang Berhormat tidak boleh mencelah, celah macam ini.

Timbalan Yang di-Pertua [Dato' Mohd Rashid Hasnon]: Ya, Peraturan 17.

Datuk Halimah binti Mohamed Sadique: Tuan Yang di-Pertua, sikit sahaja lagi. Yang Berhormat tanya apakah tindakan penambahbaikan yang dilakukan oleh MITRA selepas saya silakan SPRM masuk untuk membuat siasatan. Saya sudah maklumkan banyak kali, kita di peringkat kementerian, di bawah MITRA, kita wujudkan tiga jawatankuasa.

Jawatankuasa Kerja di peringkat Ketua Pengarah MITRA, bersama dengan pegawai-pegawai kanan untuk ia saring permohonan itu dan kemudian bawa kepada Jawatankuasa Penilai yang dipengerusikan oleh Datuk KSU saya ada di belakang ini. Selepas Jawatankuasa Penilai membuat penimbangan dan membuat syor untuk dipertimbangkan kelulusan, daripada Jawatankuasa Saringan yang dipengerusikan oleh Ketua Pengarah MITRA di peringkat MITRA. Selepas diluluskan permohonan-permohonan yang dimohon sama ada NGO dan sebagainya, maka pemantauan akan dijalankan di bawah Jawatankuasa Pemantau yang juga dipengerusikan oleh Yang Bahagia, Datuk KSU saya.

Jadi, soalan Yang Berhormat kalau ada penyalahgunaan dana apa yang akan berlaku? Waktu yang lepas, kita yang jemput SPRM masuk. Saya yang jemput SPRM masuk ke dalam MITRA. Apabila ada banyak sangkaan-sangkaan, persepsi yang tidak sihat dan sebagainya, saya jemput SPRM masuk. Bukan SPRM yang masuk, saya yang jemput SPRM masuk. Sekiranya dengan apa yang kita lakukan atas tadbir urus yang lebih mantap lagi, selepas apa yang berlaku, Yang Berhormat adalah seperti berikut;

- (i) pemurnian Garis Panduan Pengurusan Geran Kewangan MITRA;
- (ii) penubuhan Jawatankuasa Nilai dan Jawatankuasa Pemantau yang saya sebutkan tadi;
- (iii) takwim tahunan bagi kedua-dua mesyuarat secara berkala dan secara mingguan;
- (iv) penetapan kadar had maksimum untuk pemberian geran kepada mana-mana organisasi. *We capped it at RM300,000*, tidak lebih daripada itu.

Kalau dulu macam-macam jumlah yang dia boleh mohon, Tuan Yang di-Pertua. Akan tetapi, kali ini *we capped it at RM300,000* sahaja *not more*. Permohonan geran kewangan MITRA dibuat secara talian. Sekiranya berlaku apa-apa dalam proses yang ada ini Yang Berhormat, kita tidak akan teragak-agak untuk membawa SPRM masuk dan melaporkan apa juga salah laku yang akan dilakukan oleh mana-mana pihak yang mendapat geran daripada MITRA ini.

Jadi, itu antara beberapa perkara. Terakhir saya hendak sebut, sehingga bulan Julai 2022, MITRA telah pun meluluskan 43 buah program yang melibatkan 71,701 penerima manfaat di negeri kepadatan tinggi masyarakat India iaitu Pulau Pinang, Perak, Selangor, Negeri Sembilan, Johor dan Wilayah Persekutuan.

Sudah tentu dalam bilangan 71,701 penerima manfaat wanita adalah menjadi tumpuan utama selain daripada kanak-kanak, belia, dewasa dan lain-lain. Jadi, saya harap itu menjawab kepada soalan Yang Berhormat. Terima kasih, Tuan Yang di-Pertua. Kalau ada Yang Berhormat rasa tertinggal kita 'pm tepi'. Terima kasih Tuan Yang di-Pertua.

Masalah Banjir Kilat di Kawasan Kulai

2.52 ptg.

Puan Teo Nie Ching [Kulai]: Terima kasih, Tuan Yang di-Pertua. Terima kasih Yang Berhormat Timbalan Menteri. Tuan Yang di-Pertua, saya ingin membangkitkan isu banjir kilat di kawasan Kulai. Isu ini bukan isu yang baharu dan banjir kilat ini berlaku setiap kali hujan turun dengan lebat walaupun hanya untuk beberapa jam.

Selepas beberapa jam, keadaan banjir akan beransur pulih. Banjir kilat ini telah berlaku beberapa kali pada tahun ini. Antara kawasan dan butiran seperti berikut:

Tarikh	Kawasan Berlaku Banjir
20/2/2022	Kampung Bahagia Ulu Choh.
27/2/2022	Jalan Persekutuan di depan Peladang, Jalan Persekutuan Kulai Besar dan Kampung Separa.
7/3/2022	Jalan Persekutuan di depan Peladang, Jalan Persekutuan Kulai Besar, Taman Selatan, Taman Sri Muhibbah, Kampung Separa dan Taman Meranti.
2/5/2022	Kampung Sri Paya, Kampung Rahmat dan Kampung Sri Rahmat.
9/5/2022	Sengkang dan J104 Jalan Sengkang di depan Kilang Lee Soon Seng.
11/5/2022	Ayer Bemban dan Kampung Melayu Sedenak.
15/5/2022	Jalan Persekutuan di depan Peladang, Jalan Persekutuan Kulai Besar, Taman Selatan, Taman Sri Muhibbah, Kampung Pertanian, Kampung Separa dan Taman Meranti.
25/5/2022	Taman Sempena, Taman Senai Jaya dan Taman Mewah Senai.
5/6/2022	Jalan Persekutuan di depan Peladang.

Walaupun tiada kemalangan jiwa ataupun kecederaan serius yang dilaporkan ketika banjir kilat tersebut, situasi banjir kilat ini merugikan warga Kulai yang baharu hendak bernafas selepas negara kini berada di fasa endemik.

Saya mendapati bahawa banjir kilat ini disebabkan oleh kegagalan sistem perparitan untuk menyalurkan air hujan dengan berkesan sehingga berlakunya takungan air hujan di sesebuah kawasan.

Untuk menyuarkan isu banjir bagi rakyat Kulai, saya telah memajukan surat rasmi kepada Yang Dipertua Majlis Perbandaran Kulai dan semua agensi kerajaan berkaitan pada 27 September 2021 dengan minta Majlis Perbandaran

Kulai (MPKu) menubuhkan Pasukan Petugas Khas bagi memantau kerja tanah dan mencari penyelesaian banjir yang kerap berlaku di Kulai. Soalan saya kepada Kementerian Perumahan dan Kerajaan Tempatan:

- (i) berapakah peruntukan untuk kerja penyelenggaraan parit monsun yang telah diluluskan oleh pihak MPKu untuk keseluruhan kawasan Kulai mengikut zon di bawah pentadbiran MPKu sejak tahun 2017 hingga 2022?;
- (ii) apakah perancangan terbaik untuk mengatasi masalah banjir kilat yang sering berlaku di Jalan Persekutuan di depan Peladang Kulai dan Jalan Persekutuan di Kulai Besar berpunca daripada sistem perparitan di bawah pihak MPKu? Berapa kos naik taraf sistem perparitan tersebut?; dan
- (iii) apakah strategi yang terbaik MPKu untuk mengatasi masalah banjir kilat ini supaya tidak berulang lagi ? Adakah terdapat pelan kerjasama dengan Jabatan Pengairan dan Saliran dan Jabatan Kerja Raya?.

Sekian. Terima kasih.

2.55 ptg.

Timbalan Menteri Perumahan dan Kerajaan Tempatan [Dato' Sri Dr. Haji Ismail bin Haji Abd Muttalib]: *Bismillahi Rahmani Rahim. Assalamualaikum warahmatullahi wabarakatuh.* Salam sejahtera dan salam Keluarga Malaysia. Terima kasih Tuan Yang di-Pertua. Terima kasih Yang Berhormat Kulai.

Tuan Yang di-Pertua, saya dan Kementerian Perumahan dan Kerajaan Tempatan simpatai di atas beberapa peristiwa banjir kilat yang melanda Kulai. Tuan Yang di-Pertua, untuk makluman Yang Berhormat, jumlah peruntukan bagi kerja-kerja penyelenggaraan parit monsun yang telah diluluskan oleh Majlis Perbandaran Kulai (MPKu) untuk keseluruhan kawasan Kulai mengikut Zon sejak tahun 2017 hingga 2022 ialah sebanyak RM6.1 juta. Perinciannya adalah seperti berikut:

Bil.	Tahun	Peruntukan (RM)
1.	2017	900,000.00
2.	2018	900,000.00
3.	2019	900,000.00
4.	2020	900,000.00
5.	2021	900,000.00
6.	2022	1,600,000.00
Jumlah		6,100,000.00

Di samping itu, bagi tempoh yang sama, kerajaan telah memperuntukkan sebanyak RM14,264,604 bagi projek naik taraf sistem perparitan di Kulai seperti

pecahan berikut; Pertama, peruntukan di bawah PB.1 KPKT sebanyak RM1,511,200.00 seperti berikut;

Bil.	Tahun	Peruntukan (RM)
1.	2017	100,000.00
2.	2018	491,200.00
3.	2019	120,000.00
4.	2020	500,000.00
5.	2021	Tiada
6.	2022	300,000.00
Jumlah		1,511,200.00

Sementara itu, peruntukan di bawah MPKu sebanyak RM12,753,404.00 seperti berikut;

Bil.	Tahun	Peruntukan (RM)
1.	2017	2,521,000.00
2.	2018	1,350,000.00
3.	2019	4,457,404.00
4.	2020	1,500,000.00
5.	2021	1,100,000.00
6.	2022	1,825,000.00
Jumlah		12,753,404.00

Secara keseluruhannya, kerajaan telah memperuntukan sebanyak RM20.364 juta bagi penyelenggaraan dan naik taraf sistem perparitan di daerah Kulai dari tahun 2017 hingga 2022. Bagi soalan kedua Yang Berhormat, soalan 'b' faktor-faktor yang dikenal pasti oleh MPKu sebagai punca banjir kilat di Jalan Persekutuan adalah seperti berikut:

- (i) pintasan pembentung Jalan Persekutuan didapati bersaiz kecil dan aras permukaan jalan yang rendah;
- (ii) sistem saliran sedia ada di Jalan Persekutuan tidak dapat menampung kapasiti air hujan dari kawasan berhampiran terutamanya dari Bandar Indahputra;
- (iii) tiada kerja penyelenggaraan sistem perparitan terutamanya di kawasan landasan kereta api yang menghubungkan ke *outlet* Sungai Skudai; dan
- (iv) paras air di Sungai Skudai didapati tinggi semasa banjir hingga menyebabkan *backflow* dengan izin pada saliran dalam kampung dan taman perumahan yang berhampiran.

Majlis Perbandaran Kulai dan Agensi yang terlibat telah pun mengambil tindakan jangka pendek bagi mengatasi masalah banjir kilat ini seperti berikut:

- (i) MPKu membina parit monsun bagi melancarkan aliran air yang lebih tinggi dari Jalan Persekutuan;
- (ii) MPKu menyelenggarakan pembersihan longkang secara berkala; dan
- (iii) YTL Corporation Berhad ini sesebuah *company* persendirian juga menjalankan kerja membersihkan longkang sedia ada yang menghubungkan ke *outlet* Sungai Skudai.

Sebagai langkah jangka panjang, beberapa agensi akan mengambil tindakan bagi mengatasi masalah banjir kilat seperti berikut:

- (i) Jabatan Kerja Raya (JKR) Daerah Kulai akan menaik taraf sistem saliran dan Jalan Persekutuan bagi meninggikan aras permukaan jalan;
- (ii) YTL Corporation Berhad akan membina parit monsun selaras dengan pembinaan landasan berkembar; dan
- (iii) Jabatan Pengairan dan Saliran (JPS) mendalamkan Sungai Skudai.

Untuk makluman Ahli Yang Berhormat juga, kos menaik taraf sistem perparitan adalah sebanyak RM1 juta dan Jabatan Kerja Raya Daerah Kulai telah mengemukakan permohonan tersebut kepada Ibu Pejabat JKR. Soalan ketiga dari segi strategi, untuk makluman Ahli Yang Berhormat, beberapa strategi dalam menangani isu banjir kilat ini diambil antaranya; Pertama MPKu telah mewujudkan satu Jawatankuasa *taskforce* dengan kerjasama pelbagai agensi teknikal yang dipengerusikan oleh Yang Dipertua Majlis Perbandaran Kulai bagi menyelia pengurusan banjir di bawah pentadbiran MPKu.

Kedua, JPS juga mengadakan Mesyuarat Penyelaras Banjir Kilat Daerah Kulai yang dipengerusikan oleh Pengerusi Jawatankuasa Perumahan dan Kerajaan Tempatan Negeri Johor.

Ketiga, sementara itu, KPKT sendiri juga mewujudkan Jawatankuasa *taskforce* bagi mengatasi masalah banjir kilat ini yang melibatkan juga kerajaan negeri dan jabatan dan agensi teknikal bagi menyelaras cadangan penyelesaian antara kerajaan negeri, jabatan dan agensi teknikal untuk mengatasi masalah banjir kilat di kawasan Pihak Berkuasa Tempatan (PBT).

Jawatankuasa ini telah menyediakan draf Pelan Tindakan Bagi Mengatasi Masalah Banjir di Kawasan PBT bagi tempoh lima tahun. Tahun 2021-2025 kita harap Yang Berhormat, berdoa supaya tidak berlaku banjir kilat lagi, untuk dilaksanakan oleh Jabatan Kerajaan Tempatan (JKT), JPS, JKR, Setiausaha Kerajaan Negeri dan PBT. Pelan tindakan tersebut memberikan penekanan kepada perkara-perkara berikut;

- (i) menaik taraf sistem saliran yang tidak sistematik, tersumbat dan tidak berfungsi;
- (ii) mewujudkan penyenggaraan sistem saliran;
- (iii) mewujudkan kawalan hakisan dan enapan;

- (iv) menyediakan Pelan Induk Saliran Mesra Alam (PISMA);
dan
- (v) mempergiatkan kempen kesedaran awam dan *capacity building* kepada orang awam.

Tuan Yang di-Pertua, sebenarnya kita ada beberapa pendekatan lain yang dilaksanakan di peringkat seluruh negara jadi boleh nanti kita tambah, jadikan panduan tambahan kepada Yang Berhormat. Terima kasih banyak Tuan Yang di-Pertua.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri atas jawapan itu. Ahli-ahli Yang Berhormat, Mesyuarat Kamar Khas hari ini ditangguhkan sehingga hari Khamis, 4 Ogos 2022, jam 2.30 petang. Terima kasih Ahli-ahli Yang Berhormat.

[Kamar Khas ditangguhkan pada pukul 3.03 petang]